

## آخر معلقة سكر

مع آخر معلقة سكر  
حطيتها في قلب الشاي  
ودوبت فيكي كالسكر  
قوليلي انساكي بس ازاي  
دا اناف بعدك قاسيت الويل  
دموع وآهات ف صبح وليل  
ومش حاسس بطعم حياه  
ومن غيرك ضعيف وذليل  
ولا طایل حياه ولا موت  
في عز النوم باعيش اللحم  
وأنادي عليكي  
وما ترديش  
واحاول اعيش  
على الذكرى  
وأملی أشوف  
نهار بكره



لكن مايجيش  
وارجع تاني للأحلام  
وأفتكر كمان مره  
وأقوم أعمل لنفسي الشاي  
وأحط بأيدي أنا السكر  
ميتين مره  
ولا يحليش  
وأروح لمكانا من تاني  
وأستنى وأتمنى  
أشوفك ياللي وحشاني  
وأبص ف ساعتني ميت نوبه  
وأمنى النفس برجوعك  
وأقول جايه  
لكن ماتجيش  
والمح واحده تشبهك  
أقول هي  
وعين الناس حواليا  
ما ترحمنيش

أقوم أمشي  
وأسرح  
فيكي بخيالي  
وفجأه قصادي الأقيكي  
وماسكه طفل ف إيديكي  
أحاول أبص ف عنكي  
تداريها وماتبصيش  
وأرجع تاني وحدي أعيش  
وابطل شاي  
عشان من بعدك السكر  
مايحليش